

Dörfligeischer 1998 (50 Jahre)

Sit füzfig Johr geischtere mir dür d' Beize,
U das tuet üs halt gäng no reize,
Vo vielne Mönsche git's luschtigi Gschichte
Wo drüber chasch gäbigi Värslidichte,
U dank üsne Politiker, wird's üs glinge
für die nöchschte 50 Johr gnue Sujet z' finge !

.... Falls nid, de blibe mir dehei
Oder wandere us uf Liechtestei !

Das Ding do hie, was chönnt das ächt si ?
So blutt, so steril, gseht das doch dri,
Als Bou-Container chasch's nid nütze,
Ou als Robi-Dog isch's nid z' benütze,
Es isch nid es Schiisi-Hüsli, so gruusig,
Dasch ds nöie Marroni-Hüsli 2000.

.... Üsi Nidougass wird attraktiver
U ds Fräss-Erläbnis gäng primitiver !

Der Kälin seit zum Accola:
Chumm mir fahre doch wie Schoggola,
Mir blibe ungerwägs es Bitzeli sto,
Wei de Oestriicher der Vortritt lo,
Mir chöi für d' Schwiz kei Guld me gwinne
Der D'Amato würd's jo glich wieder finge !

.... Chumm, mir ässe no chlei Chäs u tüe warte,
Doch nöchscht Johr wei mer mit der Swissair dürestarte !

Eis, oder drü, oder zwöi, oder siebe,
oder wär'i äch besser ufem Sächsi blibe,
Nei, nei i lo mi nid lo hetze,
U tue doch lieber uf ds Füüfi setze,
Dä Ma hett nid öppe Casino-Wahn,
Dä studiert der nöii VB-Plan !

.... Üse Vorschlag wär es biologischs Öko-Sparprogramm :
Am Beschte göht dir zrüg zum Rössliträm !

Bim Schwyzer Fernseh-Redli-Dräier-Quiz
Dört git's e riesegrosse Bschiß ?
Do seit eine d'Antwort uf die nöchschi Frog,
U wird derfür vom Gwüsse plögt,
Jetzt steuet euch vor - jo verreckt, das wär's
Mir brächte hie d' Pointe vom nöchschte Vär's !

.... Oh Gabriela, du bisch so ne liebe Schatz,
I Dire Sändig hett jede Schlawiner Platz !

Dr Hansruedi Aerni isch jetzt bim EHC Manager,
Dört luegt är, dass ds Gäld nümme flügt usem Fänschter
Är luegt zum rächte, wie sech's ghört,
Nume, dass ihm dört niemer meh drischnört,
Schliesslech hett är uf politischem Isch träniert,
Und mir hoffe, dass är's nid no als Trainer probiert !

.... Dr Cadieux bliibt zum Glück no do,
Süsich würd dr Aerni scho hüür a'r Bande scto !

Es brummet der Otti im Schlof vor der Glotzi:
"Lotti, Lotti, du weisch ig wott di,"
Do rüeft ds Lotti us der Chuchi am Otti:
"Was liirisch Otti, vo wägere Foti ?"
"Nüt vore Foti", seit der Otti zum Lotti,
"Ig tröime doch nume vo'r EXPO-Pippilotti !"

.... Hei Pippi Langstrumpf, ar EXPO do si Froue Trumf,
Hei Stöckli Housi, bisch umgäbe vo B....

Freude herrscht im Schneegestöber
Seit dr Ogi ds Japan zu de Snöber
Und sini Ouge tüe grad blitze,
So schnäll über all die Pischte flitze
Dasch huere geil, das hani begriffe,

I gloub jetz foni no afo kiffe !